

## Saopštenje za medije Ureda za reviziju institucija u Federaciji BiH

Predstavnički dom Parlamenta Federacije Bosne i Hercegovine usvojio je prijedlog Budžeta Federacije BiH za 2017. godinu, na sjednici održanoj 20.12.2016. godine.

Finansiranje Ureda za reviziju institucija u FBiH (u daljem tekstu Ured za reviziju) uređeno je članom 5. Zakona o reviziji institucija u FBiH koji jasno propisuje da Ured za reviziju priprema nacrt svog godišnjeg budžeta i dostavlja ga Parlamentarnoj komisiji odgovornoj za reviziju na odobravanje. Po odobravanju Parlamentarne komisije, nacrt budžeta se dostavlja Federalnom ministarstvu finansija radi uključivanja u nacrt Budžeta Federacije Bosne i Hercegovine.

**Nacrt budžeta Ureda za reviziju institucija u Federaciji Bosne i Hercegovine za 2017. godinu, odobren je od strane Parlamentarne komisije odgovorne za reviziju u sadržini kako je predložen od strane Ureda za reviziju.** Predloženi nacrt budžeta zasnovan je na planiranim aktivnostima i potrebnim ljudskim resursima. Planom i programom rada Ureda za reviziju institucija u FBiH za 2017. godinu, predviđeno je povećanje revizija u odnosu na prethodnu godinu za 43%, za što je potrebno osigurati dodatna finansijska sredstva i ljudske resurse. Posebno je bitno naglasiti, da u nadležnosti Ureda je više od 2.000 subjekata za reviziju.

Odobreni nacrt budžeta, u istom sadržaju kako je i odobren od strane Parlamentarne komisije, **dostavljen je Federalnom ministarstvu finansija, radi uključivanja** u nacrt Budžeta Federacije Bosne i Hercegovine za 2017. godinu.

**Međutim, nije postupljeno u skladu sa Zakonom, jer je izvršeno umanjjenje budžeta Ureda za reviziju za 2017. godinu bez prethodnih konsultacija, a kojeg je Vlada Federacije BiH u tako umanjenom iznosu usvojila 18.11.2016. godine.**

Neuključivanjem odobrenog budžeta u Budžet Federacije BiH, te umanjnjem istog bez prethodnih konsultacija, nije postupljeno u skladu sa Zakonom o reviziji institucija u FBiH u dijelu člana 5. Finansiranje Ureda za reviziju, kao i člana 50. koji navodi, da u slučaju sukoba ovog i odredbi drugih zakona, primjenjivat će se odredbe Zakona o reviziji.

Također, navedenim postupanjem nisu ispoštovani i Međunarodni standardi vrhovnih revizorskih institucija („ISSAI“), obzirom da je ugrožena finansijska, funkcionalna i organizaciona nezavisnost Ureda za reviziju, koja je utemeljena u ISSAI 1 - Limska deklaracija o smjernicama za pravila revizije.

Umanjenje budžeta dovodi u pitanje izvršavanje planiranih zadataka i neophodan prijem revizorskog osoblja.

Obzirom da se Bosna i Hercegovina opredjelila za Evropske integracije, neophodno je da se poštuju smjernice, direktive i drugi zahtjevi koje EU postavlja kako bi se dobio status kandidata. U vezi s tim, ukazuje se na **Izveštaj o Bosni i Hercegovini za 2016. godinu** Evropske komisije, koji jasno navodi da Ured za reviziju institucija u Federaciji Bosne i Hercegovine nema dovoljne kapacitete za vanjsku reviziju, čiji obim je znatno veći u Federaciji BiH nego na ostalim nivoima.

**Upitnik Evropske komisije za pripremu mišljenja o zahtjevu za članstvo u EU** u Poglavlju 32. Finansijska kontrola, postavlja jasno sljedeća pitanja: Da li je nezavisnost svake vrhovne revizorske institucije zasnovana na Ustavu i da li su vrhovne revizorske institucije finansijski nezavisne od izvršne vlasti? Da li vrhovne revizorske institucije imaju pravo na korištenje sredstava koja su im dodijeljena na način koji njima odgovara?

**SIGMA Principi javne uprave** identifikuju potrebu da zakonski okvir vrhovnih revizorskih institucija osigurava finansijsku nezavisnost od izvršne vlasti i omogućava vrhovnim revizorskim institucijama da koriste odobreni budžet u skladu sa svojim potrebama (Princip 15).

**Strategija za borbu protiv korupcije 2016.-2019.** u Federaciji BiH prepoznaje kao strateški program: jačanje uloge revizije i kontrole putem specijalizacije, kadrovskog popunjavanja i primjene inovativnih rješenja u vršenju poslova nadzora i kontrole.

Prilikom pripreme nacrt **Strategije upravljanja javnim finansijama u FBiH**, Uredu za reviziju je predloženo (od strane SIGMA stručnjaka i Federalnog ministarstva finansija) uključenje sljedeće mjere: Jačanje kapaciteta revizije, te sljedeća aktivnost: priprema i implementacija plana povećanja uposlenih tokom određenog perioda u Uredu za reviziju institucija Federacije BiH da bi se osiguralo da može na odgovarajući način ispunjavati svoje obaveze prema zakonu o reviziji. Navedenom mjerom i aktivnošću bi se osiguralo da javne finansije u Federaciji BiH podliježu efikasnom nadzoru.

Ured za reviziju je u više navrata pismenim obraćanjem ukazivalo Federalnom ministarstvu finansija na obavezu postupanja u skladu sa zakonom, kao i Parlamentu Federacije BiH, Parlamentarnoj komisiji i Vladi Federacije BiH o važnosti očuvanja nezavisnosti i kredibiliteta Ureda za reviziju.

**Ured za reviziju, kao vrhovna revizorska institucija, može postići svoje ciljeve objektivno i efikasno samo ako je zaštićen od vanjskog uticaja i nezavisan od subjekata revizije (ISSAI 10 - Meksička deklaracija o nezavisnosti vrhovnih revizorskih institucija).**

Sarajevo, 29.12.2016. godine